

Date – 21/06/18

Time - 18:30 -18:40Hrs

REGIONAL NEWS BULLETIN(MIZO)

HEADLINES (EVENING)

- Vawiin khan Aizawl-ah kum khat chung awh Healthy Mizoram Campaign khar a ni a, hemi rualhian International Yoga Day vawi 4-na hman nghal a ni.
- Central YMA President hoa Executive Committeechuan Supply Reduction Service (SRS) chhunzawm zel ni se an ti.
- Manipur Police-te chuan ADC chairman Chandel Lhukhosei Zou chu ruihhlo cheng vaibelchhe 27.5 hu a kawl avangin an man.
- Vawiin International Yoga Day chu ramchung leh rampawn hmun hrang hrangah hman a ni.

<><><>

HEALTHY MIZORAM PROG CLOSED/INTERNATIONAL YOGA DAY

Vawiin khan Aizawl Sipai Lammuala-ah kum khat chung awh Healthy Mizoram Campaign kharna hun hman a ni a, hemi rual hian Internatioanl Yoga Day vawi 4-na hman nghal a ni.

Healthy Mizoram Campaign chungchang hi 46 AR Commandant Col. Patyush Kumar Singh Gor-a'n AIR Aizawl hrilhin, Governor kal chhuak ta Nirbhay Sharma-a ngaihtuah chhuah a ni a, nikum International Yoga Day vawi 3-naah khan Campaign hi hawn a ni, a ti a. Kum khat chung Campaign neih a nih chungin \um 150 vel HIV/AIDS leh natna tlanglawn chungchang inhrilhhriatna hun buatsaih hman a ni a, hei bakah hian hmun hrang hrangah damlo a thlawna inentirna hun hawn a ni bawka, mipui an lo hrisel zawk nan Yoga pawh inzirtir \hin a ni, a ti a. Healthy Mizoram Campaign-in a tum ber chu sipaite mai bakah Mizo mipui nawlpui, a bikin thingtlang hmun kilkhawra cheng, damdawi in pan harsa leh hriselna kawnga hriatna nei tlemte'n hriselna an neih theih nana hmalak a ni, AR Commandant chuan a ti.

Vawiina Healthy Mizoram Campaign kharna hunah hian khuallian ICFAI University Vice Chancellor Lt.Gen. AK Mishra-a chuan Assam Rifles te hmalakna fakin, hrisel taka nundan mipuite zirtirna kawnga an hnathawh, a bikin thingtlang kilkhawr zawka chengte tana an hmalakna \ha a tih thu a sawi a ni.

He hunah hian New Delhi Rashtrapati Bhavan a\anga lo kal Naturopathy & Neuropathy Expert Ram Gopal Dixit bakah Assam Rifles mi leh sa te, NCC cadet te, sawrkar department \henkhat aiawh te, zirlaite leh tlawmngai pawl te an tel a ni.
(Corr)

<><><>

BJP

Mizoram BJP Thalai te chuan nimin khan Mizoram Underground Returnees Association (MURA) memembr te chaw ngheina hmun Aizawla Treasury Square a MURA Office ah an tlawh a.

BJP Thalaite chuan MURA te chaw nghei ngai khawpa an awm chu pawl an tih thu leh an harsatna tawh chu arang thei

ang ber a, Sorkar-in tihhlawhtlinsak ngei an beisei tih an sawi a ni.

Mizoram Sorkarin MURA nen Kum 2013 Nov 5-a inremna an dah chu, Congress Sorkar chuan a ngaihthah hle a ni tih a hriat a, an inremna ang hian Mizoram a Sorkarna chelh mek Congress Party hian a tih hlawhtlinsak em tih hi BJP Thalaite chuan an zawhna a ni, an ti a. MURA Member Chawnghei ten a an sawi danin Agreement an ziah atanga an thu dah an tihhlawhtlinsak tawh chu za ah 1 pawh a ni lo hial ang an ti a, chuvangin Congress Sorkar hian MURA Member te hetiang taka an ngaihthah chhan hi MURA Member te hmuhsitna anga an ngaih thu vawiin khan thuchhuah siamin an sawi a ni.

(PR)

<><><>

MLA BR. K. BEICHHUA ON NEET CATEGORY

Doctor zir tumte tana paltlang ngai NEET result tihchhuah taka Mara leh Lai te Category II leh III-a dah an ni chu a lawm loh thu Siaha bialtu MLA Dr. K.Beichhua-a'n a sawi.

Vawiina Siaha Press Club-a chanchinbumite a kawmnaah DR. K. Beichhua chuan NEET result tihchhuah taka tling Nick K.Dyuhra leh Albert Hemang te Category II leh III-a dah an ni chu tihluh nge tihpalh tih Higher & Technical Edn. Minister a zawh thu leh tihpalh a nih chuan a rang thei ang bera siam \ha tur leh tihluh a nih chuan chiang taka Lai leh Mara te dinhmun sawifiah nghal tura a phut thu a sawi a ni.

Dr. K. Beichhua hian vawiina Siaha Dist. Jail a tlawh thu pawh chanchinbumite hi hrihlin Jail tangte hriselna sorkarin a ngai pawimawh lo hle, a ti a. TB, Hepatitis leh HIV veite tang ta se mi dang an kaichhawng thei dawn tih sawiin, tun thlenga Nurse duty dah a la ni lo chu a pawh hle a ni, a ti a.

Siaha Jail leh Superintendent office te chu luah tlak tawh loh a nih thu te, thirlen chung a\anga damdawi pawh vawm luh theih mai a nih thu te, tangte tan himna a awm loh thu te pawh sawiin Dr. K. Beichhua chuan Jail Manual 2017 anga Siaha Dist. Jail min enkawl a phut thu te a sawi a ni.

Dr. K. Beichhua hian a MLA LAD Fund hmangin Siaha Dist. Jail-ah hian a thlawna inentirna hun a hawng a; jail tang mi 74-te hriselna dinhmun a ensak vek a, a mamawhte tan a thlawnin damdawi a pe bawk.

(PTC Siaha)

<><><>

CYMA TO CONTINUE SRS

Vawiina Central YMA President hoa Executive Committee (CEC) \hukhawm chuan Central YMA hnuai Ruihhlo Do Pawl, Supply Reduction Service (SRS) chu chhonzawm zel ni se an ti.

SRS kaihrwaitu tur pawh ruat nghalin Convener atan CYMA Fin. Secy. an ruat a, an term hun chung hi thla thar July ni 1 a\anga October thla thlang a ni ang.

Hei bakah hian CYMA CEC chuan Upper Chindwin Youth Network Director-in tun thla ni 26-a Ruihhlo Do Programme an hman turah Central YMA telpui tura a sawm angin President Pu Vanlalruata leh hrwaitu dangte'n telpui se an ti a. PWD nena thawhdunna tur thuthlung an ziah bawhzui nan leh inhrilhfiah

nan thla thar ni 5-ah khian Sub-Hqrs., Group leh Branch te leh Aizawl khawpui chung Branch aiawhte leh PWD hotute nen inkawmho nise an ti bawk.

Vawiin CYMA CEC \hukhawm chuan kumin YMA Day tluang taka Mizoram chung leh pawna YMA dinna hmuna lawm a ni thei chu lawmawm an tih thu sawiin, YMA Day chu sawrkarin chawlha a puan ang ngei a pawl leh Kohhran hrang hrangte'n programme dang siam lova, midangte \anpui nana hman a ni chu lawmawm an ti takzet tih an sawi a.

(PR)

<><><>

LAWNGTLAI

State Institute of Rural Development & Panchayati Raj buatsaihin thingtlanga chengten hmasawna an neih theih nana ruahmanna siam dan chungchang inhrilhhriatna vawiin khan Lai Autonomous District Council-a Member of District Council leh LADC a Senior Officer te tan neih a ni.

Ni hnih aw h tur, Lawngtlai SSA BRC Hall-a he hun hman hi, Lawngtlai DC, Pu N.Chakhai chuan hawngin, mipuiten an khua leh anmahni ngei pawhin hmasawna tak tak an neih theih nan ruahmanna an siam thiam lova, hmasawna a awm theih nana hmalatu, sorkara mi pawimawh ten ruahmanna siam dan an thiam a pawimawh tak zet a, ruahmanna \ha tak hnuaia hnathawh a nih chuan hmasawna pawh a kal chak \hin a ni, a ti.

Village Development Plan siamdan zirhonaah hian State Institute of Rural Development & Panchayati Raj Mizoram a\angin Senior Core Faculty, Pu Khawlsiamthanga Khawlhring leh Faculty (Social Mobilization) Pu John Lalnunsanga ten zirtirna an pe a ni.

Ministry of Gram Panchayati Raj-in hriattirna a tihchhuah angin thingtlang khuaten hmasawna tluantling an neih theih nan Village Development Plan (Gram Panchayati Development Plan) siama hemi zulzuia hnathawh a nih tur thu SIRD mithiamte hian sawiin, thingtlang khuaten hmasawna an neih theih nana hna thawh hmasak tur leh hmasawna chu inkhaidiat chhoa a kal theih nana ruahmanna siam dan te kalkhawmte an zirtir a, chawhnu lamah sawihona hun hman a ni.

(PTC Lawngtlai)

<><><>

NTUM - MR

National Trade Union of Mizoram (NTUM) chuan Mizoram sawrkarin MR Quota, zaa 25 a\anga zaa 35-a tihpunsak leh Works department hnuaia MR 5,000 chuang approval a pek avangin lawmthu an sawi.

Vawiin khan Aizawl Press Club-ah chanchin thar thehdarhtute kawmin NTUM hruaitute chuan kumin March thla Assembly budget session-ah khan, Labour Minister-in "MR te hi Labour Law hnuaia chhawr an ni" tiin zawhna a chhang a, heti a nih chuan Labour Law hnuaia ham\hatna chi hrang hrang te hi dawng ve thei dinhmunah an ding tih ziaka dah a ni ta a.

Vawiin thlengin an thla tin hlawh bak engmah pek an la ni chuang lo, an ti a.

MR te chhawrna mumal awm lova siam te, an hlawh pawh a aia hniama inchhawr phal lohna khawpa beitham, Minimum Wage ringawt hmansak an la ni chu khawvel kalphung nena inrem lo nia a lan tawh avangin, ran chhawr ang maia inchhawr loa dinhmun thar pea an nihna chawisansak turin sawrkar an ngen tih an sawi bawk.

(Corr)

<><><>

MANN KI BAAT

Prime Minister Narendra Modia'n Mann Ki Baat programme kaltlanga All India Radio-a mipuite hnena a thuchah sawi chu tun Pathianni chawhma dar 11 hian tihchhuah a ni leh dawn a. Mizo tawnga lehlinin a chhonzawm ang a, zan dar riatah tihchhuah nawn leh a ni ang.

(Newsonair)

<><><>

MANIPUR POLICE ARRESTS ADC CHAIRMAN WITH DRUGS WORTH OVER RS 27 CR

Manipur Police-te chuan Autonomous District Council (ADC) chairman Chandel Lhukhosei Zou chu ruihhlo cheng vaibelchhe 27.5 hu a kawl avangin an man. Ani bakah hian a thawhpui mi 7 man tel an ni bawk a. Police te chuan thuchhuah siamin Manipur sawrkarin ruihhlo laka beihpui nasa taka a thlak tih lantirna a nih thu an sawi a. Heng mi mante hi ni 10 chhung Police te kutah an awm ang. Hetihlai hian Pu Zou-a hi Manipur State-a BJP atangin hnawhchhuah a ni zui nghal bawk.

(NewsonAir)

<><><>

YOGA DAY

Vawiin International Yoga Day chu ramchhung leh rampawn hmun hrang hrangah hman a ni a. India-ah a chuan a hmanna pui ber hi Dehradun-ah Prime Minister Narendra Modi hoin tukin khan hman a ni a. Dehradun-a Forest Research Institute-ah he ni hmang tura inpe sang chuang kalkhawmte nen a huhoin Yoga an ti a.

Thusawiin Prime Minister Modi chuan Yoga ti thinte chu chibai bukin Yoga chu hmasanga India sakhaw mifingten mihringte tana malsawmna hlu tak an hnutchhiah a nih thu a sawi a. Taksa insawizawina satliah a ni mai lo a, taksa hriselna thlentu, thothang tha tak leh hrisel taka taksa awm theihna tura thil pawimawh tak a ni a ti a. Insuihkhawmna tha chak tak a nih mek thu leh khawvel pumah beihpui lian tak a ni tawh a ti a. India mipuite hnam nunphunga bet tlat leh hnam hrang hrang suiikhawmtu a nih thu a sawi bawk.

Vawiin Yoga Day-ah hian Rajasthan-ah chuan khawvel record thar siam niin Kota hmunah mipui sing 6 chuang kalkhawm chuan a ruala yoga an ti a. Hei hi hmun khata a ruala yoga tih tam ber a ni.

(Newsonair)

<><><>